

督撫考滿給由疏

奏爲給由事臣見年五十四歲山西平陽府曲沃縣人中隆慶二年進士五年二月除刑部陝西司主事萬曆二年四月調吏部稽勲司主事本年五月調本部驗封司主事十一月調考功司主事三年四月給假送父還鄉四年九月起送到部本年十月除補本部考功司主事五年三月調文選司主事本年四月陞本部稽勲司署員外郎事主事六年三月

實授本年四月調驗封司員外郎十二月具
奏回籍調理九年十二月起送到部十年正月
除補本部文選司員外郎本年三月陞驗封
司署郎中事員外郎九月實授本月回籍守
制十三年四月起送到部本月復除本部文
選司郎中十四年二月陞太常寺少卿十五
年三月陞大理寺右少卿本年十二月陞本
寺左少卿十六年六月十三日陞太常寺卿
本月十九日到任至十七年二月二十五日

連閏實歷俸九箇月零七日該吏部等衙門
會推題奉

聖旨李 陞都察院右副都御史巡撫四川等處
地方提督軍務寫勅與他欽此臣當赴鴻臚寺
報名詣

闕謝

恩都察院到任隨領

勅書一道於本年八月二十二日前到督撫地方
接管行事扣至十九年十月十四日又連閏

實歷俸二十六箇月零二十三日通前實歷
正三品俸三十六箇月三年任滿先於本年
閏三月內准都察院咨爲稽查章奏隨事考
成以脩實政事該科臣類叅各省撫按官未
完事件題奉

欽依內開四川巡撫李 罰俸二箇月備咨前來
臣已遵照案行四川布政司扣俸二箇月不
支外伏覩

大明會典內一款凡在京給由官員不拘陞俸住
俸罰俸俱以見任職事所歷月日准作實歷欽
此所有臣任內實歷過年月日期應合報滿
伏乞

勅下吏部查例施行臣無任悚慄待罪之至緣係
給由事理爲此具本謹具奏

聞伏候

勅旨

叅究府佐官員疏

題爲府佐貪縱不法遵例勘究已明併叅行賄
軍官乞

賜罷斥提問以肅法紀事據四川按察司呈問得
犯人鄒鳳儀年四十一歲江西九江府德化
縣人由選貢見任四川成都府寧越撫夷通
判招稱云云蒙司將鄒鳳儀等具招呈詳到
臣案照先該臣訪得通判鄒鳳儀居官不檢
貪穢著聞已經開單牌行按察司提問招解

前來查得各項贓跡似未盡究又經駁行再
勘去後今據前因覆查情罪相協除將陳添
祿等批行該司追贓發配發落行結外該臣
會同巡按四川監察李御史叅看得成都府
寧越撫夷通判鄒鳳儀器比斗筭慾同谿壑
宰邑已多穢跡巧事彌縫倖郡恃駐邊方益
恣貪肆任羣小以張鷟則苞苴時通悉衆賂
而無收故囊橐日溢官箴旣壞徒斥何辭及
照四川行都司建昌衛指揮使章以仁施勳

徐韶文指揮同知王言吉李紹武指揮僉事
王異張維藩會川衛指揮使俞寵張輔周指
揮僉事王啓建昌衛左所鎮撫冷宗映會川
衛左所副千戶郭師文建昌衛左所副千戶
周承芳鹽井衛左所正千戶陶棐建昌打冲
河中所副千戶李堯臣會川衛後所實授百
戶龔繼恩建昌衛右所試百戶李朝武本衛
鎮撫歐應時鎮西千戶所副千戶吳嘉謨越
嵩衛河南站試百戶陳宗武鎮西驛試百戶

魏國忠猥以武流叨承軍政不思奉公持已
敢於玩法行私朋從餽納事實類於請求箕
歛逢迎意惟圖為容悅俱當提問正罪以為
邊方武弁投賄者戒也伏乞

勅下都察院將鄒鳳儀情罪再加查議如果允當
覆

請行臣等將本官追完贓贖發回原籍為民革以
仁等行巡按御史提問施行緣係府佐貪縱
不法遵例勘究已明併叅行賄軍官乞

賜罷斥提問以肅法紀事理未敢擅便為此具本
謹題請

旨

縣令患病乞休疏

題爲縣令病勢危篤乞放生歸以全軀命事據
四川布政使司呈奉臣批據四川按察司分
巡上川南帶管分守道副使陳明經呈先據
嘉定州申據獲爲縣申本縣知縣周仲良偶
於本年七月內得患痰血病症勢甚危急命
在涇臬乞官交代俯容休致等情到州備申
本道隨批該州行令本官謝事調養間又據
該州申稱本官腹心之疾錮於膏肓痰血之

病轉以沉劇殊可憐憫等因到道該本道看
得知縣周仲良到任以來圖治甚勤不意染
疾頓深乞休甚切據其資材似爲可惜而查
情詞實非得已况該縣繁劇難於久虛若復
遷延則病體縣事必致兩誤相應准令本官
致仕回籍調理員缺類報銓補其該縣印務
另詳委官署管等因照詳奉批仰布政司查
確詳報奉此行准該道咨稱覆行署本州印
烏撤軍民府同知胡考崇查得本官委果病
勢危恙已不能支到無託故詐病情由備咨
到司該本司看得知縣周仲良居官頗著賢
聲告休不無可惜但病篤一節既經該道重
覆查實並無託避之情合無暫令在任調理
本司一面另呈委官前去接署縣務仍乞速
與題

請准令致仕回籍等因到臣卷查先准都察院咨
准吏部咨爲參究府佐官員擅自回籍以警
將來以肅臣節事內開外官告休自知縣以

上例應題

請等因備咨前來通行遵照外今據前因時值按
臣交代境上該臣看得捷爲縣知縣周仲良
官守無愆吏才亦稱顧乃抱病沉痾勢已就
危且該邑劇繁不宜久曠旣經司道重覆查
的並無託避之情相應題

請伏乞

勅下該部將知縣周仲良議令致仕員缺另爲銓
補施行緣係縣令病勢危篤乞放生歸以全

旨

軀命事理未敢擅便爲此具本謹題請

撫蜀奏議後序

凡進言之難非空譚之難也當局
易眩則謀始之難衆咻易撓則持
議之難以事機燃眉之急而敷陳
待報於

君門萬里之遠則蚤見而當於事情
之爲難然則進言誠不易哉余橫

襟而窺古今上封事多矣它無具
論卽經畧西事如古兩李公至今
譚者壯之唐衛公靖以十策上孝
恭悉召巴蜀酋長子弟量才部署
卒取蕭銑定荆夔樹節特進左僕
射文饒公節度西鎮建樓雘邊因
降吐蕃悉怛謀上狀敷歷至平章

事加太尉皆有大造於蜀蜀之人
歌思之不衰以今曲沃李公所經
畧西事者比勛絜猷殆若合符節
也與哉公之功業不在甲冑而在
尊俎公之神情不在彪炳而在鎮
定公之規爲措注不恣睢以才智
自用而務開誠布公集思廣益斷

斷有古大臣風故其人品足以楷
世而勞畫足以貞度非深於道者
能乎初下車下令詢民間疾苦罷
一切苛政而力圖所以休養生全
之尤以知人爲安民第一義吏有
不飾簠簋骫法侵牟其民者時檄
所司廉狀以聞不旋踵且疏斥之
矣將校自偏裨而上有庸懦債帥
無裨邊計者立

請汰黜之恐後而又度地與人隨
宜疏

請更置無一不當

上意惟公之言之是聽值歲大稔航
粟蔽江以賑川東南所存活以億

萬計皆其計安元元之大者迨歲
庚寅冬羗夷跳梁屠我關堡公扼
腕嘆曰何物小醜曾不足當我一
騎而敢蟻含蠆螫犯我牧圉乎此
之不撲將燎原矣乃上疏請討調
將募兵鍛甲砥劒飛芻輓粟四方
之英毅雲屯霆震於營壘間而屬
不佞以橐鞬從事論列功次因睹
公所石畫最熟公建牙灌口距營
壘肆百里而遙將吏某勇某懷某
諳某踈若燭照而耳目之軍士股
慄莫敢惰窳矢石不爲凶深入不
爲險雪嶺不爲高瘴雨蠻烟不爲
苦奮戟控弦舉旗執馘凡參閱月

而參犁羗庭羗人避地千里賴以
戡定上酬

當宁拊髀之思下貽蜀人安堵之福
矣凱奏

上大嘉悅膺上賞蔭子太學嗟嗟
上所以懋績而懋賞者果直以文墨
議論也乎哉公撫蜀叁年以蜀事

上者累數拾萬言而大致在敷宣
主威甦恤民困以忠誠稱

意旨所陳說與措之施行不爽毛
髮茲晉少司寇且行檢筭付梓不
佞不能從史祇以昔二李公嘗徼
福於蜀者撫其梗概以方公所謂
後先輝映非耶若乃勛庸究竟將

德與夔龍爭高名與天壤共敵則
恐二李公不足倫矣

萬曆壬辰孟春

四川等處提刑按察司副使臨汝

陳文煥頓首書

